

Na osnovu člana 55b. stav 3. Zakona o pravima branilaca i članova njihovih porodica ("Službene novine Federacije BiH", br. 33/04, 56/05, 70/07, 9/10 i 90/17), federalni ministar za pitanja boraca i invalida odbrambeno-oslobodilačkog rata donosi

PRAVILNIK

O USPOSTAVI JEDINSTVENOG REGISTRA BRANILACA I KORISNIKA PRAVA IZ OBLASTI BRANILAČKO-INVALIDSKE ZAŠTITE

I - OPĆE ODREDBE

Član 1. (Predmet)

Ovim Pravilnikom uređuju se uslovi, način i postupak prikupljanja podataka, formiranje, vođenje Jedinostvenog registra branilaca i korisnika prava iz branilačko-invalidske zaštite (u daljnjem tekstu: Jedinostveni registar), određuju podaci koji se unose u Jedinostveni registar, sadržaj dokumenata Jedinostvenog registra, postupak upravljanja podacima iz Jedinostvenog registra, razmjena i korištenje podataka i druga pitanja u vezi sa uspostavom Jedinostvenog registra.

Član 2. (Definicija Jedinostvenog registra, subjekti uspostave i dostupnost registra)

(1) Jedinostveni registar sastoji se od popisa branilaca i popisa korisnika prava iz oblasti branilačko-invalidske zaštite a u isti se unose podaci na način propisan ovim pravilnikom.

(2) Federalno ministarstvo za pitanja boraca i invalida odbrambeno-oslobodilačkog rata/Federalno ministarstvo za pitanja branitelja i invalida domovinskog rata (u daljem tekstu: Federalno ministarstvo), uspostavlja Jedinostveni registar u saradnji sa kantonalnim ministarstvima i upravama nadležnim za branilačko- invalidsku zaštitu (u daljem tekstu: kantonalni organi) i općinskim službama nadležnim za boračko-invalidsku zaštitu (u daljem tekstu: općinska služba) i nadležnim organom za boračko-invalidsku zaštitu Brčko Distrikta Bosne i Hercegovine (u daljem tekstu: Brčko Distrikt BiH).

(3) Jedinostveni registar će biti dostupan svim nivoima vlasti resorima koji se bave pitanjima branilačko-invalidske zaštite u Federaciji Bosne i Hercegovine (u daljem tekstu: Federacija) putem organa iz stava 2. ovog člana, a podaci iz Jedinostvenog registra predstavljaju službenu tajnu i mogu se koristiti isključivo za službene potrebe.

(4) Federalno ministarstvo upravlja, vodi i održava Jedinostveni registar.

Član 3. (Pojmovnik)

(1) Oružane snage čine pripadnici ARBiH, HVO i pripadnici policije nadležnog organa unutrašnjih poslova (u daljem tekstu: Oružane snage).

(2) Jedinstveni registar branilaca i korisnika prava iz oblasti branilačko-invalidske zaštite predstavlja elektronska baza podataka, koja se formira prikupljanjem i unošenjem podataka o pripadnicima Oružanih snaga i korisnicima prava.

(3) Braniocem se smatraju lica koja imaju status branioca odbrambeno-oslobodilačkog rata u skladu sa članom 2. Zakona o pravima branilaca i članova njihovih porodica ("Službene novine Federacije BiH", broj 33/04, 56/05, 70/07, 9/10 i 90/17), i nalaze se u evidenciji nadležnih organa na općinskom nivou.

(4) Korisnici prava su branioci i članovi njihovih porodica koji su koristili ili koriste prava u skladu sa propisima svih nivoa vlasti (Federacija, kantoni, općine), počev od 1996. godine i nadalje, a finansirana su ili se finansiraju iz budžeta Federacije, kantona i općina. Korisnici prava su i lica iz člana 69. stav 2. Zakona o pravima branilaca i članova njihovih porodica, kao i sva druga lica koja su obuhvaćena tim zakonom.

(5) Pod pojmom "prava" podrazumijevaju se sve novčane mjesečne i jednokratne naknade, kao i davanja u materijalu, stvarima, uslugama i sl., koja imaju protuvrijednost u novcu a finansirana su ili se finansiraju iz budžeta Federacije, budžeta kantona, budžeta općina i budžeta Brčko Distrikta BiH.

(6) Upravljanje elektronskom bazom odnosno Jedinstvenim registrom podrazumijeva: priprema, objedinjavanje, uspostava, verifikiranje, održavanje, ažuriranje i raspolaganje podacima iz elektronske baze.

(7) ISVDV sistem podrazumijeva upravljanje obračunom i isplatom mjesečnih novčanih naknada iz oblasti branilačko-invalidske zaštite po federalnim propisima.

Član 4. (Prikupljanje, unos, objedinjavanje i ažuriranje podataka)

(1) Popis branilaca u skladu sa ovim pravilnikom čine pojedinačne specifikacije svih pripadnika Oružanih snaga.

(2) Popis korisnika čine pojedinačne specifikacije naknada svih korisnika sa svih nivoa vlasti.

(3) Dostavljeni podaci se sortiraju u opći ili posebni dio pojedinačne specifikacije jednog korisnika prava.

(4) Federalno ministarstvo vrši objedinjavanje podataka iz popisa branilaca i popisa korisnika u Jedinstveni registar koji čine pojedinačne specifikacije svih branilaca i korisnika prava.

(5) Elektronska baza podataka Jedinstvenog registra branilaca i korisnika formira se i vodi na način koji

osigurava ažurnost, operativnost i sigurnost pohranjenih podataka.

(6) Podaci koji se unose u Jedinostveni registar se šifriraju po šifrniku koji odobrava federalni ministar na prijedlog lica odgovornog za poslove Jedinostvenog registra.

II - OSNOV UNOSA PODATAKA U POPIS BRANILACA

Član 5. (Opći dio iz popisa branilaca)

Podaci iz popisa branilaca koji će biti dostupni svim nivoima vlasti resorima koji se bave pitanjima branilačko-invalidske zaštite u Federaciji i Brčko Distriktu BiH su:

- a) Prezime (ime oca), ime;
- b) Mjesto, općina i datum rođenja;
- c) Spol;
- d) Državljanstvo;
- e) Adresa prebivališta;
- f) Služba tokom rata (broj mjeseci);
- g) Komponenta oružanih snaga;
- h) Organizaciona cjelina u kojoj se vodi u vojnim evidencijama;
- i) Status (demobilisan, otpušten, poginuo, umro u ratu, preminuo nakon rata i dr.).

Član 6. (Osnov za unos podataka u popis branilaca)

Osnov za unos podataka u odabranu informatičku aplikaciju popisa branilaca su:

- a) Matične knjige vojnih obaveznika (Vob-1);
- b) Matični karton (Vob-2);
- c) Jedinični karton (Vob-3);
- d) Personalni karton (PK-1 / PERS-7);

e) Knjige privremeno prijavljenih vojnih obaveznika (Vob-6), u Vob-6 su uvedeni prognanici, žene, nesposobni za vojnu službu, dobrovoljci, strani državljani, starija godišta, mlađa godišta i dr.);

f) Obrasci PP-1 ili OS-1 i sva druga vojno evidencijska dokumenta iz branilačko-invalidske zaštite, na način propisan ovim pravilnikom.

III - OSNOV ZA UNOS PODATAKA U POPIS KORISNIKA

Član 7.

(Osnov za unos i sortiranje podataka u popis korisnika)

(1) Osnov za unos podataka u informatičku aplikaciju (ISVDV) popis korisnika su prava regulisana federalnim zakonima, kao i dopunskim pravima koja su regulisana kantonalnom, općinskom i legislativom Distrikta Brčko BiH, u skladu sa obavezama iz člana 55b. Zakona o pravima branilaca i članova njihovih porodica.

(2) Dostavljeni podaci se sortiraju u opći ili posebni dio pojedinačne specifikacije jednog korisnika, koji je koristio ili koristi prava iz člana 3. stav 4. ovog pravilnika na svim nivoima vlasti (konačna rješenja i zaključci nadležnog organa, presude, odluke ili druga pravna akta na osnovu kojih su ostvarena prava).

Član 8.

(Opći dio iz popisa korisnika)

Opći podaci koji se unose u popis korisnika:

- a) Prezime (ime oca), ime nosioca prava;
- b) Služba tokom rata (broj mjeseci);
- c) Mjesto, općina i datum rođenja;
- d) Državljanstvo nosioca prava;
- e) Spol nosioca prava;
- f) Adresa prebivališta nosioca prava;
- g) Podaci o članovima domaćinstva-kućna lista nosioca prava;
- h) Prezime (ime oca), ime korisnika prava;
- i) Mjesto, općina i datum rođenja korisnika prava;
- j) Adresa prebivališta korisnika prava jednog ili više proizišlih od nosioca prava);

k) Status korisnika prava (RVI, poginuli, član porodice šehida, poginulog branioca, član porodice umrlog RVI, mirnodopski vojni invalid i dr.).

Član 9.
(Posebni dio iz popisa korisnika)

Podaci koji se unose u popis korisnika pored osnovnih identifikacijskih podataka iz člana 8. ovog pravilnika sadrži i slijedeće podatke koji će biti dostupni svim nivoima vlasti resorima koji se bave pitanjima branilačko-invalidske zaštite u Federaciji:

- a) Naziv institucije na teret čijeg budžeta je isplaćena mjesečna naknada ili jednokratna naknada, davanje u materijalu, stvarima, uslugama i sl, koja imaju protuvrijednost u novcu, a finansiraju se iz budžeta svih nivoa vlasti;
- b) Vrsta prava;
- c) Pravni osnov;
- d) Vrsta, broj i datum akta na osnovu kojeg je izvršena isplata, odnosno na osnovu kojeg se i isplata vrši i nadalje;
- e) Odgovorno lice;
- f) Lice koje je izvršilo unos podataka;
- g) Učestalost isplata (jednokratno, mjesečno, tromjesečno, godišnje i dr.);
- h) Iznos isplate;
- i) Datum isplate.

Član 10.
(Obaveze o unosu podataka korisnika po federalnim propisima)

Podaci koje Federalno ministarstvo unosi u popis korisnika prava koja su koristili ili koriste po federalnim propisima su:

- a) Podatak o ličnoj invalidnini (broj i datum pravnog akta, novčani iznos);
- b) Podatak o dodatku za njegu i pomoć drugog lica (broj i datum pravnog akta, novčani iznos);
- c) Podatak o ortopedskom dodatku (broj i datum pravnog akta, novčani iznos);
- d) Podatak o porodičnoj invalidnini (nosilac - broj i datum pravnog akta, novčani iznos);

- e) Podatak o uvećanoj porodičnoj invalidnini (nosilac - broj i datum pravnog akta, novčani iznos);
- f) Podatak o mjesečnoj novčanoj naknadi za nosioce ratnog priznanja i odlikovanja (broj i datum pravnog akta, novčani iznos);
- g) Podatak o dodijeljenoj pomoći u slučaju smrti (RVI, demobilisani, član porodice - broj i datum pravnog akta, novčani iznos);
- h) Podatke o jednokratnoj novčanoj pomoći za troškove liječenja (broj i datum pravnog akta, novčani iznos);
- i) Podatke o jednokratnoj novčanoj pomoći za troškove sahrane/dženaze demobilisanog branioca ili člana uže porodice (broj i datum pravnog akta, novčani iznos);
- j) Podatke o datim pravima za rješavanje stambenog pitanja (dodjela stana, krediti, bespovratna sredstva, građevinski materijal (boj i datum pravnog akta, finansijski pokazatelj); k) Podatke o dodijeljenom MTS-vozilo za 100% RVI (broj i datum pravnog akta, finansijski pokazatelj);
- l) Podatke o dodijeljenom MTS - (poljoprivredne mašine, cirkular, i dr. - broj i datum pravnog akta, finansijski pokazatelj);
- m) Podatke o dodijeljenoj pomoći u stoci (osnov ostvarivanja, finansijski pokazatelj);
- n) Podatke o novčanoj otpremnini prilikom sporazumnog raskida DVS (broj i datum pravnog akta, finansijski pokazatelj);
- o) Podatak o mjesečnoj novčanoj naknadi za pružanje pravne pomoći osumnjičenim i optuženim pripadnicima OS (broj i datum pravnog akta, novčani iznos);
- p) Podatke o pomoći u sufinansiranju zapošljavanja pripadnika branilačkih populacija (novčana pomoć za zapošljavanje i samozapošljavanje putem projekata i sl. - broj i datum pravnog akta);
- q) Podaci o novčanoj pomoći za vrijeme nezaposlenosti demobilisanih branilaca po Zakonu o pravima demobilisanih branilaca i članova njihovih porodica koji je prestao važiti 01.05.2010. godine (broj i datum pravnog akta, novčani iznos);
- r) Podaci o novčanoj pomoći za demobilisane braniocce u slučaju potrebe po odluci Vlade Federacije BiH (broj i datum pravnog akta, novčani iznos);
- s) Podaci o drugim primanjima i naknadama ostvarenim po federalnim propisima.

Član 11.

(Obaveze o unosu podataka kantonalnih, općinskih i organa Brčko Distrikta BiH)

(1) Podaci koji kantonalni, općinski i organi Brčko Distrikta BiH unose u popis korisnika prava koja su koristili ili koriste po kantonalnim, općinskim i propisima Brčko Distrikta BiH su:

- a) Podatak o dodijeljenoj pomoći u slučaju smrti (RVI, demobilisani, član porodice - broj i datum pravnog akta, novčani iznos);
- b) Podatke o mjesečnoj novčanoj naknadi za RVI 100% I grupe (broj i datum pravnog akta, novčani iznos);
- c) Podatke o dodatku na mjesečnu novčanu naknadu za nosioce ratnog priznanja i odlikovanja sa nivoa kantona i općina (broj i datum pravnog akta, finansijski pokazatelj);
- d) Podatke o novčanoj naknadi za vrijeme nezaposlenosti (broj i datum pravnog akta, novčani iznos);
- e) Podatke o jednokratnoj novčanoj pomoći za troškove liječenja demobilisanog branioca i člana njegove uže porodice (broj i datum pravnog akta, novčani iznos);
- f) Podatke o jednokratnoj novčanoj pomoći za troškove sahrane demobilisanog branioca (broj i datum pravnog akta, novčani iznos);
- g) Podatke o jednokratnoj novčanoj pomoći za troškove sahrane užeg člana porodice demobilisanog branioca (broj i datum pravnog akta, novčani iznos);
- h) Podatke o pomoći u sufinansiranju zapošljavanja pripadnika branilačkih populacija (novčana pomoć za zapošljavanje i samozapošljavanje putem projekata i sl. - broj i datum pravnog akta, novčani iznos);
- i) Podatke o datoj prednosti pri zakupu i otkupu poslovnog prostora (broj i datum pravnog akta, vremenski period, finansijski pokazatelj);
- j) Podatke o datim besplatnim udžbenicima za redovno školovanje (broj i datum pravnog akta, finansijski pokazatelj);
- k) Podatke o datim pravima za rješavanje stambenog pitanja dodjela stana, kuće ili stambenog objekta (broj i datum pravnog akta, finansijski pokazatelj);
- l) Podatke o datim pravima za rješavanje stambenog pitanja adaptacija kuće, stana (broj i datum pravnog akta, finansijski pokazatelj);
- m) Podatke o dodijeljenom MTS - (poljoprivredne mašine, cirkular, i dr. - broj i datum pravnog akta, finansijski pokazatelj);
- n) Podatke o dodijeljenoj pomoći u stoci (broj i datum pravnog akta, finansijski pokazatelj);
- o) Podatke o obavještanju o smrti putem javnih medija, organizovanje ukopa-sahrane uz državne počasti i pravo na ukopno mjesto na lokacijama zaslužnih ličnosti (broj i datum pravnog akta, finansijski pokazatelj);
- p) Podatke o korištenju naknade troškova ukopa-sahrane i podizanje nišana, odnosno nadgrobnih spomenika (broj i datum pravnog akta, finansijski pokazatelj);
- q) Podatke o omogućenom i plaćenom liječenju u inostranstvu, banjско liječenje u obimu koji je propisan

- za vojne invalide (broj i datum pravnog akta, finansijski pokazatelj);
- r) Podatke o ostvarenom prioritetu korištenja programa nadležnih službi za zapošljavanje (broj i datum pravnog akta, finansijski pokazatelj);
- s) Podatke o datom prioritetu prilikom dodjele stipendija i smještaja u đачke i studentske domove za redovne učenike i studente (broj i datum pravnog akta, finansijski pokazatelj);
- t) Podatke o oslobađanju od plaćanja naknade za pogodnosti i naknade za uređenje građevinskog zemljišta i obaveze naknade za dodijeljeno gradsko-građevinsko zemljište (broj i datum pravnog akta, finansijski pokazatelj);
- u) Podatke o korištenju povlastice u gradskom prijevozu u skladu sa važećim propisima (broj i datum pravnog akta, finansijski pokazatelj);
- v) Podatke o mjesečnoj novčanoj naknadi za pružanje pravne pomoći osumnjičenim i optuženim pripadnicima OS (finansijski pokazatelj);
- w) Podatak o uplaćenim iznosima za zdravstvenu zaštitu za RVI i članove njihove porodice, porodici poginulih, umrlih, nestalih branilaca, članovima porodice umrlih RVI i demobilisanih branilaca, iz obaveznog zdravstvenog osiguranja, u skladu sa odredbama Zakona o zdravstvenoj zaštiti i Zakona o zdravstvenom osiguranju, ukoliko to pravo ne mogu ostvariti po drugom osnovu (broj i datum pravnog akta, finansijski pokazatelj);
- x) Druga primanja i naknade ostvarene po kantonalnim, općinskim i propisima Brčko Distrikta BiH (vrsta prava, broj i datum pravnog akta).

IV - POSTUPAK UNOŠENJA PODATAKA U ELEKTRONSKU BAZU

Član 12.

(Priprema i unos podataka u popis branilaca)

- (1) Pripremu i unos podataka u elektronsku bazu popisa branilaca vrše ovlaštena lica Federalnog ministarstva raspoređeni u općinama (Grupe - Samostalni izvršioc i za pitanja evidencija iz oblasti vojne obaveze), u informatičku aplikaciju dobijenu od Federalnog ministarstva i odgovorni su za tačnost i vjerodostojnost unesenih podataka.
- (2) Elektronske podatke i podatke u pismenom obliku dobijene od općinskih organa Federalno ministarstvo čuva trajno.
- (3) Objedinjeni podaci migriraju se u Jedinstveni registar branilaca i korisnika prava.

Član 13.
(Priprema i unos podataka u popis korisnika)

(1) Ovlaštena lica kantonalnih, općinskih organa i nadležnog organa Brčko Distrikta BiH vrše pripremu i unos podataka iz člana 11. ovog pravilnika u elektronsku bazu popisa korisnika i odgovaraju za njihovu tačnost i vjerodostojnost.

(2) Objedinjeni podaci migriraju se u Jedinštveni registar branilaca i korisnika prava.

(3) Elektronske podatke dobijene od općinskih organa kantonalni organi čuvaju trajno.

(4) Federalno ministarstvo podatke iz Jedinštvenog registra čuva trajno.

Član 14.
(Ažuriranje Jedinštvenog registra)

Podaci uneseni u elektronsku bazu Jedinštvenog registra mogu se mijenjati u slučajevima:

a) ako naknadno u propisanom postupku, nadležno tijelo utvrdi promjenu podataka;

b) ako su podaci unijeti u elektronsku bazu registra branilaca na osnovu lažnih isprava;

c) ako su podaci unijeti u elektronsku bazu registra korisnika na osnovu lažnih isprava;

d) ako se naknadnom provjerom utvrdi da su podaci unijeti u elektronsku bazu popisa branilaca i popisa korisnika neispravni ili nepotpuni;

e) u drugim slučajevima u kojima se u propisanom postupku mogu mijenjati podaci u službenoj evidenciji organa.

V - PRISTUP INFORMACIJAMA

Član 15.
(Zaštita ličnih podataka i pristup informacijama)

U postupku po zahtjevu za pristup informacijama iz elektronske baze Jedinštvenog registra koji podnesu fizička i pravna lica, primjenjivat će se Zakon o zaštiti ličnih podataka i Zakon o slobodi pristupa informacijama u Federaciji Bosne i Hercegovine.

VI - ROKOVI

Član 16.
(Rokovi za unos podataka)

(1) Unos podataka u Jedinostveni registar vršit će se u skladu sa datim rokovima iz člana 12. stav (1) Zakona o jedinstvenom registru korisnika gotovinskih naknada na koje se ne uplaćuju doprinosi ("Službene novine Federacije BiH", broj 25/17).

(2) Popis korisnika prava iz oblasti branilačko-invalidske zaštite za 2017. godinu uspostaviti će se u roku od 30 dana od dana stupanja na snagu ovog Pravilnika.

(3) Unos podataka u popis korisnika će se nastaviti u kontinuitetu retroaktivno od 1996. godine, u roku od šest mjeseci od dana instaliranja aplikacije za popis korisnika.

(4) Popis branilaca će se uspostaviti u roku od 30 dana od dana instaliranja aplikacije za popis branilaca.

(5) Jedinostveni registar branilaca i korisnika prava će se uspostaviti u roku od šest mjeseci od dana instaliranja aplikacije za popis branilaca i korisnika prava.

VII - PRIJELAZNE I ZAVRŠNE ODREDBE

Član 17.
(Tehničko uputstvo)

Unos, obrada, korištenje i mjere zaštite podataka iz Jedinostvenog registra vršit će se u skladu sa tehničkim uputstvom, koje će biti sastavni dio odobrenog softverskog rješenja.

Član 18.
(Prestanak važenja prijašnjeg pravilnika)

Danom stupanja na snagu ovog pravilnika prestaje da važi Pravilnik o Jedinostvenom registru branilaca i korisnika prava iz oblasti branilačko-invalidske zaštite ("Službene novine Federacije BiH", broj 53/09).

Član 19.
(Stupanje na snagu)

Ovaj pravilnik stupa na snagu narednog dana od dana objave u "Službenim novinama Federacije BiH".

Broj 05-41-6296/17
19. januara/siječnja 2018. godine
Sarajevo

Ministar
Doc. dr. **Salko Bukvarević**, s. r.